

Fahaman SiHulk difatwakan sesat

IPOH - Jawatankuasa Fatwa Negeri Perak memutuskan ajaran dan fahaman yang dibawa oleh Suhaini Mohammad atau SiHulk sebagai sesat.

Mufti Perak, Datuk Wan Zahidi Wan Teh berkata, keputusan dibuat dalam mesyuarat Jawatankuasa Fatwa Negeri kali ke-221 pada Disember 2020

itu juga memperakukan fahaman itu menyeleweng daripada ajaran Islam.

Menurutnya, ketetapan itu berdasarkan beberapa ciri fahaman yang secara jelas mendakwa Nabi Muhammad SAW adalah Tuhan selain menyatakan Baginda seorang yang tidak mempunyai jantina iaitu bukan lelaki juga bukan wanita.

"Dia juga telah menyelewengkan tafsiran al-Quran menerusi huraian surah Taha ayat 120 dan al-Baqarah ayat 35 berkenaan larangan ALLAH SWT kepada Nabi Adam dan Hawa daripada memakan buah khuldi dengan dakwaan bahawa buah itu yang menjadi larangan untuk dimakan di dalam syurga, adalah buah zakar dan buah dada," katanya menerusi satu kenyataan yang dimuat naik di Facebook.

Wan Zahidi berkata, ajaran itu turut mengeksploitasi elemen agama secara berlebihan ter-



WAN ZAHIDI

hadap produk-produk yang dikeluarkan seperti air dan botol SiHulk di Facebook Sohail Ibnu Muhammad dan Facebook SiHulk untuk menarik minat orang ramai membelinya.

"Antaranya membuat tafsiran yang salah terhadap ayat al-

Quran pada surah al-Baqarah ayat 248 dengan menyatakan SiHulk merupakan air hayat iaitu air yang diperoleh Nabi Khidir AS menjadikan Baginda mampu hidup sehingga hari kiamat.

"Produk itu didakwa mampu menyembuhkan pelbagai wabak penyakit zahir dan batin serta menghalang daripada sihir selain digunakan untuk melaksanakan ritual menangkap jin ke dalam botol," katanya.

Justeru beliau menggesa agar fahaman dan ajaran itu segera disekat daripada disebar-kan kepada umat Islam.

Katanya, mana-mana orang Islam adalah dilarang untuk berpegang, beramal atau terlibat dengan fahaman dan ajaran tersebut.

"Mereka yang mengamalkan fahaman dan ajaran ini hendaklah segera bertaubat serta memohon keampunan daripada ALLAH SWT," katanya.